

CHÖRLIÖBELI, 5. Mai 2018

JOORESÜCKBLICK 2017

Bis ändi Joor wärde mir öbbe 16 Ufftritt ha
jetzt föömer aber bim Erschte a

1) Chörliöbeli 8. April 2017

S'Marlies und dr Arno hän nit könne cho,
sie haig e bösi Schilddriese übercho.
Dr Arno het nit gross Erbarme ka,
das sig halt e so, well sie immer s'letscht Wort will ha.
Um die zwei duet sich s'halbe Chörli in dr Schalterhalle bim Sven aamälde,
und denn goots zackig mit dr Bahn uff Rhyfälde.
Für einisch göhn mir nit ins Klybeckschlössli, sondern ins Fäldschlössli,
dört gseesch zerscht e mool e dünns Bierbrauer Rössli.
Die Einte mach e Fyerig und lehre öbbis derby,
die Andere gheye Bier in Köpf, schyyns sige das die Invalide gsi.
Wo mer die uff de Bai hänn, do könne Zwei fascht nümme stoh,
hänn mir denn Rhyfälde verloo.
Per Bahn und Tram
fahre mir in St. Johann,
Nach em Apéro gits Znachtässe
doch leider kasch s'Fleisch fascht nit ässe!
S'isch scharf wie s'Meiers Lumpi,
meint dr Kurt, die alti Pumpi.
Au dr Zauberer ka do nüt meh mache,
derfür kasch bi ihm stuune und au lache.
S'git no Ehrige, e Jooresrückblick und ganz ungezwunge,
hänn mir für unseri Fraue sagehafti drey Lieder gsunge.
Y hoff s'chäm nit so wyt,
dass am e Öbeli d'Lieder numme no ab CD git.
Für d'Organisation könne mir dr Sven nur lobe,
är findet immer wieder öbbis Neuys für dä Obe.
Es isch nit immer eifach mit dämm Chor,
drum machsch du das am beschte für die nägschte zäh Joor.
So öbbe am halbi zwölfi isch das Öbeli verby,
sisch ganz e gmietlige Aaloss gsy.
Alli hänn's als schön empfunde,
dass s'Rösli, dr Werni, d'Carla und d'Janna hänn könne derby sy, in unserer Runde.

2) Ufftritt 6. Mai 2017 im Seemannskäller bi de "Rätschwyber"

18 hübschi, knackigi, luschtigi "Rätschwyber" sin in Seemannskäller cho
und uusgrächnet denn, isch dr Othmar nit do.
Är segglet in Australie vo de Spinne furt
und do im Käller isch giggerig dr Schwyzer Kurt.
Bim erschte Trinkspruch zwüsche duure,
hänn mir denn gly gmerkt, die könne denn au singe, nit numme schnuure.
Wo sie denn no zwei Gitarre und e Rüttmuss-Schemel füüre nämme, wird mir angscht und
bang,
kömme mir ächt aa mit unserem Gsang?

Sie singe Eigeni und Lumpelieder und das denn guet,
dr Widmer Peter sich scho uffpluschtere duet
Är froggt, ob är zu ihne könnt cho, do sait Eini jo,
wenn är sich würd umbauue lo.
Mir singe voller Lyydeschaft, bi de Fraue gits Träne und nassi Unterhose,
das sig ihne no nie passiert und das numme scho bim loose.
Dr Sven foot afo balze
und duet miteme Rätschwyb e Ringelreihe tanze.
Dr Pitt passt laufend dr Speak an däne Wyber a,
derfür hänn mir kei Gage ka.
Dr Röbi seit für eimool haig är alles gseh,
wäge dämm däge ihm jetzt d'Auge weh.
E schöne "affe-titte-mega-geile" Obe hänn mir mit däne Wyber dörfe verbringe
und hänn denn au gmerkt, dass Anderi au könne singe.
Übrigens, unseri zwei wy, - wy, - wybliche Wääse hänn super gschpielt
und d'Elisabeth het einisch meh vergäabe nach eme Lover in Publikum gschielt.

3) Ufftritt, Samschtig 20. Mai 2017, Schiffstauti "Excellence Pearl"

Dr Othmar isch nooni do,
derfür isch Christa Rigozzi und dr Sven Epiney cho.
Me trifft sich am viertel ab zähni bim Museum
und zieht sich dört au um.
Mir schländere an d'Uferstroos 70, das isch bim Klybeck Aaleger zwei,
göhn an Bord und benämme uns wie dehai.
Irgend wenn kömme denn die erschte Gescht für e Schnupperfahrt,
mir wäre scho lang parat.
S'goot denn bis vor die Mittlery Brugg,
denn abe bis an Dreyländeregg und wieder an Aaleger zrug.
Zwüsche dr erschte und dr zweite Fahrt isch dr Roger no ko
und mir hänn e Butterbrot, Bier und Wasser bycho.
Jewyls sächs Lieder hänn mir in dr Lounge uff jedere Fahrt gsunge,
für uns wär dä Ufftritt eigentlich jetzt umme.
Dr Dürremättli sait, är miess jetzt in Garte, haig Setzlig kauft,
das kasch aber nit mache, das Schiff isch nonig tauft.
D'Frau Twerenbold vo dr Mittelthurgau Reise verzellt uns derno
e Gschicht, wie sie zu dämm Dampfer isch ko.
Uff dr Wärf sigg dä Dampfer inne total ussbrennt, Uursach unbekannt,
derby passt doch das zum Schifssname "Rembrand".
Sie kauft die Schale, sigg e Schnäppli,
s'Einzig wo me no vo Inne ka bruuche, sigg d'Schissiplättli.
Jetzt liggt dä Schlappe do
und sött e neue Name überko.
Die ganzi Taufzeremonie wird vom Pfarrer Felix Christ, Christa Rigozzi, Sven Epiney und
Frau Twerenbold überno
und mir könne jetzt ändlig heime go.
E Paar könes nit loo
und hänn im Rest. Schiff no e Schlumberbächer gno.
Es gäb do no e Gschichtli, vomene verlorene und wieder gfundene Ehering,
aber das z'beschriebe, gäll René, wär e bitzeli zviel.

4) Ufftritt, Sunntig, 21. Mai 2017, Hafenfescht Birsfælde

D'Hose sin immer no e bitz warm vo geschter Zmittag
und scho sinn mir in Birsfælde wieder parat.
D'Müllere het geschter no-nem Ufftritt Klamotte grad aabhalte,
är meint, es gäb e so viel weniger Falte.
Dr Othmar het do keini Problem mit de Falte in de Hose,
är trait in Australie sowieso numme Unterhose.
Bim "roschtige Anker" am eins sinn die Meischte do,
und hänn e Guetschyn vo 25 Stutz für Ässe und Trinke übercho.
Nach e-me kurze Saund-Check goots scho los,
s'Publikum und s'Wätter sind ganz famos.
Mir ziehn das ganz yeasy duure,
die Meischte sind vom Vortag no uff dr Schuure.
Wäge dämm stimmt jetzt d'Gschwindigkeit, das könnt me für immer e so lo,
denn würde nämlig d'Lüüt, au no unseri Tegscht verstoh.
Mit de "Swiss-Mariners" hämmer no e Seschen gmacht,
do het bim Peter Widmer s'Härz, d'Lunge, d'Niere und dr Fuesspilz glacht.
Dr Pitt het bim umzieh e Zirkusryffy Schau abzooge,
d'Bank goht uff die einti Sytte uff und är liegt am Bode.
Är wälzt sich umme wie e aagschossene Gryzlibär und sait: "äääh
die Uniform kan-y bim Käthi grad zum wäsche gäh".
Au dä Ufftritt isch umme
und y glaub är isch ys glunge.

5) Ufftritt 7. Juni 2017 "Rhenus" im Seegarte Brüglige

Für einisch sin Alli in d'Grien Achzig cho,
sälbscht dr Othmar isch wieder do.
Är sait: "wäge uns wär är sicher nit cho,
aber Heimweh wägem Hund haig är bycho".
Dr Heinz schleppt dr Haspel aane,
jetzt fählt numme no d'Orgele vo dr Elisabeth, he nunde Fahne.
Do springt dr "Fitibaldi" vo Birsfælde y,
är fäggt uff Klaihünige und isch bald wieder by uns derby.
Unseri zwei "Chörlifahrer", dr Sven und dr Heinz, könnte jo zum Uber go,
numme aalüte und sie stööhn scho do.
Gäll Elisabeth, aalüte muesch denn scho,
sunscht muesch halt mit em Taxi cho.
Nach em Salat und Suppe het d'Frau Henke vo dr Rhenus e kleiny Aasproch ka
und denn sin mir mit drey Lieder dra.
Zwüsche Wiehnacht und Neujoor,
ah nei, zwüsche Hauptgang und Dessert und das isch jetzt wohr,
singt nomool dä beriehm, berüchtigt Seemannschor.
Dr Heinz duet s'Mikrofoon für d'Vorsänger yrichte, das gieng jo no,
aber nochhär sait är au no wie muesch aanestoh.
"Gang nööcher aane, nei jetzt bisch z'nooch,
jetzt mach s'Mikrofoon uff, nei jetzt isches z'hoch".
E Schritt links oder zwei,
am Schluss hesch e Knüppel in de Bei.

Dr Heinz will jo au nur s'Beschte, für e Club und d'Chor,
gäll blybsch no öbbe zwanzig Joor.
Wenn dr Pitt by sym guete Speak uff e Stuehl absitze duet,
wüsse mir Alli, es goot ihm nit so guet.
Liebe Pitt, ei possitivi Sytte muesch du au gseh,
me seht kai Ranze meh.

6) Ufftritt, Samschtig, 17. Juni 2017, "Bootsgnosseschaft" in Birrwil am Hawylersee

Hütt dien mir mit unserne eigene Kutsche fahre,
damit mer könne Chlütter spare.
Jetzt wo dr Arno für einisch nooch hätt ka zum cho,
isch är aber nit do.
In Birrwil isch am säggsi Zoobe traffe gsi
und sälbscht dr Roger isch derby.
Noch em Apéro, mit warmem. wysse Wy,
sin mir druffaabe scho bim Nachtässe gsi.
Für eimool het dr Kurt vom Othmar kai Salat übercho,
derfür het dr Othmar em Kurt, dr Schinke grad zum Täller use gno.
Kuum hän mir dr letschi Bisse zue-n-ys gno,
mien mir uff die riesigi Bühni uff go.
Zum Glück het dr Pitt und dr Heinz vor Tage scho inspiziert
und au dämentsprächend reagiert.
Als unseri Begränzig hets d'Windhutze gha
und Positionslampe grad näbe dra.
Z'mitzt drinn dr Haspel links und rächts hets zwei Poller,
so wirkt die Bühni öbbis voller.
Zwüsche em erschte und em zweite Block blybe mir uff dr Bühni als Kulisse,
dr René sait zu mir, är sött scho lang go Sch.....,
(sich denn au ohni gange).
Bim zweite Block het dr Peter Widmer glaub scho Heiweeh gha,
är pressiert und foot bi fascht alle Lieder viel z'friehe a.
Dr Othmar sait, wenn mir e Muggeseckeli schnäller würde singe,
könnte mir gatt jedes zweite Wort überspringe.

7) Ufftritt 23. Juni 2017, APH "Langmatten" , Binninge

D'Silvia isch in bella Italia und schmoort in dr Sunne,
während dämm irrt dr Arno im Näbel bi de Irre umme.
Tenü isch dr Stauer,
e so wie mir aagleggt sinn, wäre mir am Fasnachtszyschtig e Gassehauer.
Dr Röbi und dr Heinz hänn wyssi Socke a,
das haig me friehner immer e so gha.
Dr Peter Widmer het gar kaini a,
dämm schliesst sich jetzt, uss Kollegialität, dr Heinz au grad a.
Dr Kurt ka grad Alli schocke,
dä kunnt do mit grien gestreifte Socke.
Jetzt no öbbis zu de Hose, s'git Kail-und-Skihose, Bad-und-Golfhose,
Pyjama-und-Winhose, Hälli-und-Dunkli, Jeans mit und ohni Löcher an de Kneui,
Schwinger-und-Strumpfhose.
Und jetzt das Ganzi geteilt durch Py,
dört sin Störtihose au derby.

Dr Kurt meint, y söll jo nüt sage,
sie könnte schliesslich au kurzi Hose trage.
Bi de Schlappe, do het sowieso Jede anderi a,
d'Müllere het no e halbe Garte dra.
Mir sötte aafu singe, aber unsere Speaker isch noni do,
är sigg irgendwo in e Stau yne ko.
Wo är denn ändlig kunnt, isch d'Elisabeth nümm do,
sie miessi no schnäll uff d'Toilette go.
Uuse gange isch sie mit-e-me Vibrator
und zrugg kunnt sie mit-e-me Handventilator.
Sie sait: "das Apperätli sygere uff e Bode gheyt und in mehreri Teili zersprunge,
sie haig denn Alles wieder zämme baut, das sigg no rächt guet glunge".
Wo mir's denn aaluege, mien mir sage, es isch nit ganz glunge,
ämmel dr Ventilator lauft dr verchhehrt Wäg umme.
Dr letschti Ton vom letschte Lied ischnoni ganz verklunge
und scho sin Drey heime gschprunge.
Dr Othmar muess uff Vinnels go Blueme sprütze,
e Stund spöter würd alles nüt me nütze.
Dr Sven und dr Peter Widmer könne dank mit dene Lychefinger nit viel aafu,
aber alli Drey sin doch an Ufftritt cho.
Es isch e warme, durschtige Obe, nur dr Härdopfelsalat und Brotwürscht sind kalt,
do hämmer halt grad no e paar Bierli aagschnallt.

8) Ufftritt Samschtig 2. Septämber 2017, Summerfescht Wiesedamm

Y ha gmeint Uuskrazige gäbs nur bi Fraue irgendwo,
bim Pitt hänn si das bim Ruggu vorgno.
Au d'Silvia het sich überno,
und cha chuuum meh vor Ruggeweh grad stoh.
Dr Räscht zieht sich um halb zwei im 8. Stock um
und do hauts my scho fascht wieder um.
Alli, sälbscht dr Schnauzi uss Wohle het schwarzi Socke a,
syni sind sogar uss Wulle, är muess immer öbbis Bessers ha.
Für syni Schlappe gits kai Schuehgrössli meh,
do muessch im Musiglade e mittlere Giegekaschte neh.
S'Marlis verbaut öbbe 4 Strange schwarzi Wulle für die riese Sogge,
derfür dörf sie denn wieder in Sytewage vom sym Oldtimer hocke.
Zwei Blöck à 5 Lieder und Zuegoob singe mir derno
und jede Vorsänger stellt sy Lied grad sälbe vor.
Dr Pitt macht by uns dr Speak und verträttet uns au gege Usse,
in Frankrych, Dütschland oder bi de Russe.
Är luegt au, dass Rueh isch im Saal, aber hüt isch är jo nit do,
jetzt het dr René s'Zepter überno.
Är pfiift, das hänn au die mit emene Hörgrät mitbicho,
wärsch du e Hund, würsch sofort ko.
Är redet wie e Iman uff die Heimbewohner y,
sie sölle doch ändlich e bitzli ruehiger sy.
Es zeigt denn au wirkig, zirka 20 Sekunde,
denn schuure sie wyter in ihrer Runde.

Nachem Gsang het dr Kurt no si grosse Ufftritt, är wieheret und scharrt scho wie es jungs Fohle,
är goot zwei, dreymool e Ässens-und-Getränkebon go hole.
Y weiss was es heisst, wenn dr Dürremättli mit em Trämli isch cho,
denn mien mir nachem Ufftritt ins Wirtshuus übere go.
Me dyspidiert über Libido, Prostata und Furunkel,
jedefalls wenn mir uuse chömme, isch es dunkel.

9) Ufftritt 29. Septämber 2017, "Hafenkranfescht"

Es isch schön zum luege, sinn Alli cho,
sälscht dr Pitt isch als Letschte do.
Pitt mir wäre gottetfroh,
wenn du an de Ufftritt e halb Stund friehener chöntisch cho.
Chum doch am Morge friehner zu dynere Furzkischte uuse
und duesch weniger lang mit dym Gschpusi schmuse.
An d'Ufftritt gosch bizyte via Ziefe, Reigoldswil, Bräzwil, Zullwil, Breitebach,
Zwinge, denn übere Blaue nach Leyme, Folgensburg, Barteheim uff Rosenau,
sisch zwar e chli wyter, aber bisch nie im Stau.
Vom Museum bis an d'Dreyrosebrugg isch jo eigentlich nit so wyt,
aber em Othmar sy Scharnier im Bei, macht do fascht nümm mit.
Ei Unterschied zwüsche dämm Schrotthuffe-Kran und em Othmar gits denn scho,
dr Othmar lauft immer no.
Zwei Blöck à vier Lieder hänn mir Vorusse dure glo,
die Meischte meine, das längt denn scho.
Doch dr Dürremättli seht das nit e so,
für sie Fründ dr Wessels könnte mir scho nonemol aanestoh.
Dr Kurt und d'Müllere renne enand fascht übere Huffe,
s'git halt Gratishäppeli und d'Zuffe.
Nachem Umzieh, y zell öbbe no Zäh,
wänn unbedingt im "Schiff" no e Teecréme go näh.
Mir stelle denn zwor gly uff Bier und Kaffifertig um,
schyns macht Teecréme dumm.
Xmol hämmer welle go,
aber immer wieder Eine gno.
Jetzt aber isch au bi de letschte Vier d'Luft langsam duss,
sie schwanke uff e "Nünerbuss".
Was, s'git kai "Nünerbuss", dient nit so pinggelig, machet my nit schissig,
vier mol nüün, git sächsedrissig.

10) Ufftritt 7. Oktober 2017, 70 Joor Vreneli Widmer im Club de Bale am Rhysprung

Für einisch isch d'Silvia nit do, y weiss au nit wiso,
derfür isch aber dr Roger ko.
Är meint: "dr Rhysprung 5 isch e gueti Adrässe,
dört gits sicher öbbis feyns z'Ässe".
Wo-n-y an d'Schiffländy bi cho,
sehny am Rhysprung unde scho ettliche, gschnyygleti, parfümierti Störtis stoh.
Eine will bim Vreneli sym Geburtstag nüt aabrenne lo,
und het sogar sie Konfirmante-Gwändli füüre gno.
Dr Bundknopf goht zwar nit zue,
drum rutsche die Hose Richtig Schueh.

Wotsch das nüm so ha,
leggsch halt Hoseträger a.
E gwüssi Skepsis hänn mir scho gha,
was für e meebesseri Gsellschaft traffe mir do a?
Doch bim Apéro merke mir denn gly,
sie trinke au nur Güpli, Bier und Wy.
Nach drey Vorspyyse sinn mir denn dra
und föön grademol mit 7 Lieder a.
D'Liederwahl het's Vreneli übernoh,
y find das isch rächt guet uusecho.
Nacheme schwyzer Bläck Angus Rindsfilet mit feyne Zuedate,
hämmer mit de nägschte Lieder könn starte.
Dr Pitt het wie immer e guete Speak ka und mir hänn glaub rächt guet gsunge,
dr Othmar het sich sogar zumene Komplimänt duuregrunge.
Är sait: "jo, jo, mir hänn au scho schlächter gsunge".
S'Modell Evelin Glanzmann isch hüt no e nätti, hübschi Frau,
d'Saskia, d'Geologin, aber au.
Schönschti an dämm Obe isch sicher gsi,
unser Geburtstagskind, s'Vreneli.
Liebs Vreneli, liebe Peter nonemol viele Dangg für dä nätti Obe,
wo mir mit Euch hänn dörfe verbringe.
Dr Pitt gestoht mir unter Träne,
y könnt das ruehig au erwähne.
Uff dr Gäschtelische stoht Pitt mit "ie" und mit eim "t",
das mieh ihm hüt no weh. (an der Norseeküste
am plattdeutschen Strand....
Tschau mitenand!)

Um das z'vemiede,
dient eifach "Peter" schriebe. P A U S E

11) Chörli-Ussflug vom 9. Oktober - 12. Oktober 2017

Basel - Köln - Amsterdam - Nijmegen - Köln - Basel

Als Gäscht hänn mir dr Tanner Hans und dr Hohler Werni mitgno
und au dr Roger als Letschte, isch denn au no cho.
Schad het d'Silvia nit könne cho und au dr Peter Leuenbärger stoht untröschlich do,
"mit wämm söll ich jetzt go schloofe go"?
Chuum hänn mir Basel verloh,
stooht scho Beatrice mit Bier und Sandwich do.
In Köln gohts mit em Buss an Rhy,
dört styyge mir in d' "MS River Art" y.
Doch scho bim Kabine yteile foot s'Theater scho a,
so ne Chnushti vo uns het weder Pass no ID ka.
Klar ka me e sone alte Maa für nüt me zwinge,
aber me will doch wüsse, wo me ihn muess zuggbringe.
D'Beatrice mit ihrem Verhandliggschick und Charme,
wicklet die Receptionische grad umme n'Arm.
Sie gitt däne a, sone Rail-Pass wie dä Chnulleri het ka,
sigg dr höggschti Uswys, wo me in dr Schwyz cha ha.
Mit dämm Rail-Pass chasch Cumulus- und Supperpünt sammle,
aber au zahle in dr Wäbergass wenn gosch go rammle.
Sie gitt däne no Einiges a,
uff jede Fall het dr Kurt e Kabine ka.

Vor em Nachtässe hänn mir no e Bootsmanöver ka
und Alli lege d'Schwimmweschte a.
D'Elisabeth het nur Auge für e schwarzi Pfiffe ka,
die bammelet au do dra.
Im Spyys-Salon isch's cheibe äng, chasch nit gross ummerugge,
sunscht hesch s'Gäbeli vo dämm näbe dra im Rügge.
Luut isches au, wie innere Bahnhofshalle,
y hör nit e mol dr Pitt, wenn är duet lalle.
Unseri Gämbler, dr Widmer Peter, dr Hans, dr Arno und dr Heinz hänn ihre Tisch bezoge,
die Andere sinn ins Restaurant oder hänn sich in ihri Kabine zruggzoge.

Dienstag, 10. Oktober 2017

Mit-e-re ruhige Nachtfahrt sinn mir uff Amsterdam cho
und hänn nach em Morgenässe e Stadtrundfahrt uff ys gno.
Au e Grachtefahrt muess scho si,
es isch au öbbis vom Schönschte gsi.
Dr René kauft Hering und stinkigy Aal,
es keyt alles an Bode, das isch ihm egal.
Är chratzt alles wieder zämme, sitzt aane und wött ändlig öbbis ässe,
aber das chasch glatt vergässe.
Y glaub dä Aal isch nony doot, är rutscht ihm wieder aabe
und genau uff e Hoselade.
Stinkt's irgendwo nach Fisch, kasch sicher si,
dr René isch au derby.
Zum Glück het är no e zweit paar Hose do,
sunscht könnt är mit uns nit e mool ins Rotlichtviertel cho.
Es sinn denn au nur Fünf-Säggs cho,
vermuetchlich isch dr Trieb nümm so do.
Eine luegt denn die Schaufänschter e chli gnauer a,
är het scho e flachi Nase gha.
Är meint: "das siege scho armi Fraue, haige jo fascht nüüt a,
är machi sofort e Kleidersammlig in Nuglar".
Dr Mike het het sy ID- und EC-Karte in dr glyche Schutzhülle an dr Rezeption hinterleggt,
wo är sie denn hole will, isch sie wegg.
Är diskutiert mit Däne an dr Rezeption,
sogar mit em-e-ne hässige Ton.
Irgend wenn im Verlauf vom Obe,
kunnt d'Elisabeth und sait, me haig ihre die Karte untere gschobe.
Dass d'Elisabeth erscht nach igx Stunde merkt, dass sie die Karte het,
het uns scho e bitzli bewegt.
Düent dr Elisabeth jetzt nit unterstelle,
sie haig dr Mike nur schelle welle.
Unseri härzige, schnuggelige Bonsai-Kabine,
s'fähle nur no farbigi Türli, denn wärs öbbis für d'Biene.
Näbe dra rumplets, tschätterets und kläpperets, ghörsch au no lache,
sisch dr Heinz und dr Pittli, y glaub die sinn nit ganz bache.
Dr Pitt hockt uff dr Schissy, het d'Füess in dr Duschi, duet lycht stöhne
und dr Heinz duet sieny Locke föhne.
S'Kabinli isch leer, d'Better sin hindere glo,
jetzt ka dr Heinz sie Fitnessprogramm duure lo.

Är zieht s'rächti Bei ganz lycht a,
damit är besser furze cha.
Mit gschtreckte Finger nimmt är e Zyygi uuse,
sprintet ans Fänschter, dört muess är zerscht verschnuufe.
S'Fänschter uff, Zyygi a,
jetzt han y scho die erscht Lektion vom Fitnessprogramm ka.

Mittwoch, 11. Oktober 2017, Nijmegen KM 884

Anstatt in Arnheim, sinn mir in Nijmegen aacho,
das isch halt au hütt bi däre Decksmannschaft e so.
(Nijmegen isch die ältischi und einzigi Hügellandschaft in de Niederlande.)
Mir laufe ins Zentrum uff,
bi de Ainte isch d'Luft scho bald dusse.
Es längt grad no in e Beiz,
do isch's supper, sinn doch d'Sitzküssi vorusse beheizt.
Schön hänn mir's do
und Kaine will me goh.
Doch plötzlich stinkts nach Fisch, sehr penetrant,
do sehn mir au dr René am Strooserand.
Är haig e paar Fischli poschtet, sigg für e Suppe,
wenn är so wytermacht, kriegt är no Schuppe.
Zirka am zwei z'Mitaag hänn mir Nijmegen verloo
und schippere Richtig Köln dervo.
Noch em Nachtässe stoht bi uns no e Ufftritt a,
mir hänn scho e flaus Gfühl im Mage gha.
Schnuure si oder luege si uns nit e mool a,
mir hänn vergäbens dr Bammel gha.
D'Lüt sin ruhig, s'het-e-ne gfalle und uns au,
nach sächs Lieder, sage mir denn Ciao.
Zwei vo de Gämmbler möge nümme spiele, ämmel nit mit de Karte,
sie wänn jetzt by de Fraue duure starte.
Dr Aint zieht d'Schlappe uss, tanzt in de Wullesogge,
so kasch sicher nit aadogge.
Dr Anderi loot si Tanzpartnere lo schnuure
und zieht siny undeyne Migrostanzschul-Schrittli duure.
D'Elisabeth närvt sich, dass sie nümm tanze cha,
jetzt schnallt sie e paar Pino-Golada a.
Uff em Ruckwäg in d'Kabine merkt sie denn gly,
au die Zyte sin verby.

Donnschtig, 12. Oktober 2017, Köln

Noch em Morgenässe packe mir unseri Waar
und stygge um in unsere Car.
Mir fahre bis zum Bahnhof und hänn "plenti Taim" ,
zum Schoppe, dr Dom, und die Andere nämme no Ein.
D'Bahnfahrt nach Basel verläuft ruhig und sehr diszipliniert,
bis uns plötzlich e Vogelpfiff irritiert.
Nach etlichem sueche hänn mir dä Vogel gfunde,
grad bi de Fuesstützi unde.

Es sinn sogenannti, schnäderfrässigi, othmarischi Blaufinke gsi,
vo däne gits in dr Oschtschwytz nur no wenigi.
Liebi Beatrice, es isch eimool mee e tolle Ussflueg gsi,
und dä Applaus isch ganz elai für dy.

12) Ufftritt 21.10.2017, "Craisy Hors" bim Hagen Jürg

D'Silvia isch in de Ferie irgendwo
und d'Müllere isch krank, het au nit chöne cho.
Dr Jürg fyyrt sy Geburtstag, drey Däg vorhär, das isch e Optimischt
und dr Heinz, wo hüt genau Siebzig isch, macht nüt, das isch e Realischt.
Jetzt wänn mir er paar Lieder singe
und dien uns in die Baracke ynezwinge.
So stell ich Mir Spargle innere Büxe vor,
aber doch nit e Seemannschor.
Wenn jetzt no s'Silveli und d'Müllere wäre cho,
hätte mir Platzangscht übercho.
Im Notfall könnt ich Eine vo dene Peters uff my Schultere näh,
nit unbedingt dr Schwab, dä wär mir z'schwär.
Gedanke mien mir uns denn mache,
wie mirs mit em Röbi mache.
Nach em erschte Ufftritt göhn mir in Windfang uuse, dört gäbs öbbis z'Ässe,
y ghör dr Kurt jammere, sie haige dr Salat vergässe.
S'git drey Möggeli Fleisch und e halbi Brotwurscht, das wärs denn gsi,
a nai, 4 Pommes sinn au no derby.
Dr René und dr Kurt hänn gsait, sie sige mit dämm Fleisch nit klar cho,
sie nämmes jetzt heim und denn wirds zerscht duure Mixer glo.
D'Gescht sinn au bim zweite Ufftritt ruhig und loose zue,
aua, jetzt stoht mir scho wieder Eine uff d'Schueh.
Dr Jürg cha nit gnueg betone, das är Gründigsmittglied isch gsi und mängs Joor,
gsunge haig im Chor, dasch aber e so nit wohr.
Wo mir hänn welle heime go
kunnt em Othmar sini grossi Show.
Wie e Drogehund robbt är am Bode unde,
luegt d'Stüehl a und das vo unde.
Alli Heizkörper wärde kontrolliert
und au alles an dr Garderobe inspiziert.
Es sigg öbbis Einzigartigs wo är do sueche dät,
jo es sigg e Rarität.
Sigg eimoolig uff däre Wält,
me könnts nümme kaufe, au nit mit e-me huffe Gäld.
Är ging so nit hei, es kääm ihm gar nit in Sinn,
ohni si schöne, griene Rägeschirm.
Dusse rägnets, är nimmt dr beschte Schirm zum Ständer uuse
und segglet heim, är well jetzt ändlich go pfuuse.
Am andere Daag het är vernoo,
dä gammlig Schirm sigg füüre cho.
Är goht en go hole, jetzt het är scho Zwei
und Vier het är scho dehei.

13) Ufftritt 11. November 2081, "MS Lällekönig", Xaver Pfister

D'Elisabeth und dr Müller Markus hänn mir am drey Zmitag am Dreiländeregg nonig gseh,
dr Markus het Kneui und d'Elisabeth het Ruggeweh.

Die Beide sötte e bitz weniger ummepflutte,
denn könnte sie zum jetzige Zytpunkt, bim FCB go schutte.
Het är z'kurzi oder z'langi Schruube, oder isch Eini öbbe locker,
das haut dr Sven no lang nit ab em Hocker.

Im Momänt sind si z'lang,
är macht überall Kräbel im Gang.

Au mit dr Lena kann är nümm ummeschmuse,
plötzlich luegt wieder so-ne Schruube use.

Dr René het e ganz wichtigi Versammlig,
oder isch är ächt wieder e mool rammlig?

Zum Glück isch dr Arno wieder do, jetzt simmer Eine meh,
wenn sich denn dr Rauch verzoge het, würde mir ihn denn au no gseh.

Ammene Apéro singe, wo Kinder ummespringe,
das wänn mir möglichscht schnäll hinter uns bringe.

Chuum isch dr erschti Block duure,
het dr Kurt und dr Pitt Nüssli, Salzstängeli, Kümmebräzeli in dr Schnuure.

Jetzt mien mir uff dr Pitt warte,
damit är si Aasag für Zuegob ka schtarte.

Vor lutter Blitzliechter vo de Paperazzi het s'Silveli d'Note nümme gseh,
do hets halt e paar Fählerli geh.

Bim Chor isch das andersch, ob de schreys, ziehsch oder lallsch,
die singe au ohni Blitzliechter falsch.

14) Ufftritt Mittwoch, 13. Dezämber 2018, am Wisedamm bi de "Junge"

Für einisch sinn Alli ko
für dr zweitletschti Ufftritt in dämm Joor.

Zum erschte Mool isch au dr Werner mit de Klamotte am-e-ne Ufftritt derby
und reiht sich grad am linke Flügel y.

Är hets nit eifach do aane stoh,
jä wär will scho zwüsche zwei Sumoringer yyne goh.

Sächs Lieder und ei Zuegoob hänn mir do gsunge,
sisch ruuhig im Saal, jo sinn halt die Junge.

Dr Othmar meint "sisch nit schlächt gsi,
aber es könnt no e chli besser si".

Im Schiff nämme mir no e guet Nacht-Teeli, oder zwei
und göhn denn z'friede Alli hei.

15) Ufftritt Samschtig, 16. Dezämber 2018, am Wisedamm

Uusgrächnet hütt isch dr Sven nit ko,
wo är doch e rächt's Stück Fleisch hätt bycho.

Irgenwie isch das em Roger z'Ohre cho,
dä stoht ämmel scho mit Tuperwär und Robidogg-Seggli do.

Do bi de Ältere isch's halt lärmig und nit aagnähm zum singe,
dorum wänn mir die 6 Lieder und 2 Zuegoobe effiziänt hinter uns bringe.

Chuum isch dr letschti Ton verklunge,
isch dr Peter Widmer in Äss-Saal gschprunge.

Är muess e wahnsinige Hunger ha
und foot grad e mol bi dr Tischdekoration uss Läbchueche a.
S'Fleisch bstellt dä verschläggti Kärli scho e mol ab,
aber bi de Zimmetstärne längt är denn wieder zue und das nit z'knapp.
Dr letschti Zimmetstärn isch e wägg und dr Kaffi dunde
und scho isch dr Peter au verschwunde.
Bringt är das schöni Presäntli vom Wiesedamm em Vreneli hai,
oder ässt är's im Auto ganz ellai?
Peter, worum bisch du immer e so pressiert,
bisch doch jetzt pensioniert.
Tue nit immer uff d'Uhr schiele,
hesch no gnueg Zyt, um mit em Vreneli und em Ysebähnli z'spiele.
Am zähni sinn scho Alli heim,
so öbbe wie im Blaukrüz-Verein.

So, jetzt sinn mir duure und ich au,
ganz sicher au my liebi Frau.
Sie hett alles, Buchstabe für Buchstabe in PC yyne glo
und ich ha alles per Knopfdruck am Drucker uuse glo.
Dankschön Moni, ohni dy könnt y dä Rückblick gar nit mache,
jä guet, s'könnt en jo au öbber Anders mache.
Und jetzt wünsch ich euch e nätte Obe, dänked dra
im Alter muess me immer gnueg Flüssigkeit ha.

P R O S T !!

Markus Tresch
5. Mai, 2018